

四庫全書

史部

欽定四庫全書

後漢紀卷二十一

晉 袁宏 撰

孝桓皇帝紀第二十一

建和元年春正月戊午大赦天下賜男子爵各有差鰥寡孤獨不能自存者粟人三斛貞婦帛人三匹二月黃龍見譙夏四月庚寅京兆地震以定策功益封大將軍梁冀萬戶太尉胡廣為安樂侯司徒趙誠為江南侯司

徒袁湯為安國侯六月太尉胡廣以病薨光祿勳杜喬  
為太尉秋七月立蠡吾侯惲為勃海王封少府梁不疑  
為潁陽侯不疑弟蒙為西平侯梁冀子胡狗為襄邑侯  
不疑子焉為潁陰侯冀孫桃為城父侯又封中常侍劉  
廣等為列侯太尉喬曰古之明君皆以用賢賞罰為務  
失國之主其朝豈無楨幹之臣典誥之篇哉患得賢不  
用其謀韜書不施其教聞善不信其義聽讒不詳其理  
也昔桀紂之時非無先王之書折中之臣然下愚難移

卒以亡國已然之鑒也陛下越從蕃王飛龍即位應天  
順人萬夫側望不急忠賢之賞而先左右之封傷善害  
德讒諛暴興大將軍梁冀兄弟姦邪傾動天下皆有正  
卯之惡未被兩觀之誅而橫見式敘各受封爵天下惆  
悵人神共憤非所為賞必當功罰必有罪也夫有功而  
不賞則為善失其望姦回而不誅則為惡遂其性故陳  
斧鉞而民不畏刑班爵位而人不樂善苟遂斯道非徒  
傷治殄民為亂而已至於喪身滅國豈不慎哉喬字叔

榮河內林慮人也少以孝悌稱歷位尚書九卿皆有名迹是時梁氏貴盛羣臣莫不傾意惟喬直道而行在位者皆以為不及也八月立皇后梁氏太后之妹也初為蠡吾侯妃未及成禮而帝即位后入掖庭數月立為皇后九月京師地震甘陵人劉文謀立清河王蒜為帝蒜閉門拒文事發覺伏誅貶蒜為尉氏侯徙桂陽郡蒜自殺冀於是誣太尉杜喬故太尉李固與文通謀喬固皆下獄固門生勃海王調等十餘人負鉞詣闕理固大

將軍長史吳祐傷固之枉與冀爭之冀怒不從從事中  
郎馬融主為冀作章表融時在坐祐謂融曰李公之罪  
成於卿手李公若誅卿何面目示天下人冀怒而起出  
喬固遂死獄中郡守承旨殺之固字子堅漢中南鄭人  
父郤為漢司徒固耽志於學雖三公子嘗自負書千里  
尋師親給灑埽學行根深無所不貫四方之士自遠而  
來僉曰復至公輔矣初固二子憲公季公並為長吏聞  
策免皆棄官歸固知罪之將及乃命二公將小子變還

鄉里固女文姬涕泣曰李氏滅矣自太公以來積德累仁何故遇此密與二公謀共逃變托言還京師矣鄉人信之後被郡書二公皆受害王成者固之僕隸也文姬厚為其資以變屬成曰君執義於公家其日久矣是以臨危託君以六尺之孤若李氏復存君之名義齊於程杵富貴榮華與君同之成為義士乃將變往徐州界變姓名為酒家僕賣卜於市陰相往來會赦得免而成病卒變厚葬之四時祭焉變既歸文姬涕泣相對因屏人

而言曰先公蹇蹇為漢忠臣雖死之日猶生之年然梁氏久暴動脅主威今弟幸全血屬豈非天乎宜杜絕衆人慎勿令斥言加於梁氏加梁氏則連主上連主上則禍重至矣變敬從姊言卒以獲全變學行才藝亞於固官至京尹卒吳祐字季英陳留長垣人父恢南海太守欲漆簡寫尚書章句時祐年十二諫恢曰今君逾江湖越五嶺僻在海邊風俗雖陋然多珍玩上為朝廷所疑下為權豪所望此書若成必載兼兩昔馬援以薏苡興



謗王陽以衣囊微名嫌疑之介先賢所慎願君少留意  
矣恢笑而撫其首曰吳氏世不乏季子矣遂然其意輟  
而不寫祐年二十喪父服除居無擔石之蓄不受宗人  
之遺牧豬長羅澤中年四十餘乃為郡吏舉孝廉遷膠  
東侯相政尚清靜以身率下以褒賢賞善為務吏民有  
以罪過相告訴者祐輒閉閣自責良久然後問之民有  
詞訟先命三老孝悌喻解之不解祐身至閭里自和之  
自是之後吏民不忍欺十月司徒趙誡為太尉司空袁

湯為司徒故太尉胡廣為司空

二年正月甲子皇帝加徽號庚午大赦天下賜王侯已下金帛各有差四月丙子立都鄉侯子為平原王五月癸丑北宮德陽殿火六月立徑城侯惲為清河王改清河為甘陵七月京師大水十月長平盜賊陳景自號為皇帝子伏誅

三年二月己丑詔曰昔在前代封墓軾間所以激忠厲俗以光後昆故光祿大夫周舉性倖夷齊直同史魚入

參贊納出司京輦有密靜之風予欽乃勲將登三事不幸夙終朕甚惜焉詩不云乎肇敏戎功用錫爾祉其賜錢千萬以旌素節四月丁卯晦雨肉大如手本志曰視之不明是謂不哲時則赤祥雨肉近赤祥也是時太后攝政梁冀專權枉誅良臣李固杜喬天下冤之十月太尉趙誠以疾罷司徒袁湯為太尉

和平元年正月甲子大赦天下已丑太后詔曰曩者遭家不造大禍薦臻欽惟宗廟之重社稷之大爰立明哲

將即委授而東南西北醜類未賓故且總攝助理萬機  
今悉討除遠慕復子明辟之義其及今宸皇帝稱制二  
月甲寅皇太后梁氏崩三月甲午葬順烈皇后乙酉爵  
大將軍冀夫人為襄城君夏五月庚辰尊區貴人為孝  
崇皇后宮曰永樂皆如長樂宮故事以蕃后不得至京  
師居真定王宮

元嘉元年正月癸酉大赦天下四月己丑上微服幸河  
東梁不疑府是日天大風尚書楊秉諫曰臣聞瑞由德

至災應事興傳曰禍福無門惟人所召乃者暴風迅疾  
殆必有異上天不言以災異譴告是以孔子曰迅雷風  
烈必有變動詩云敬天之怒不敢驅馳王者至尊出入  
有常警蹕而行清室而止自非郊廟鷹旗不駕故詩稱  
自郊徂宮易曰王假有廟致孝享也未有私從意志日  
般遊諸臣之家降尊卑等威無別宿衛守空宮璽紱  
委女妾設有非常之變任章之謀上負先帝下悔靡及  
臣奕世受恩得備納言又以薄學充在勸講特蒙光識

見照日月恩重命輕敢陳其愚大將軍冀怨秉出為扶  
風太守初秉侍講以經學見重太常黃瓊以秉勸講帷  
幄不宜外遷留拜光祿大夫當冀之時抑而不用十月  
司空胡廣薨太常黃瓊為司空十一月辛巳京師地震  
詔百官上封事靡有所諱舉獨行之士各一人安平崔寔  
郡舉詣公車稱病不對退而論世事曰凡天下所以不  
治者其患在世承平政漸衰而不改俗漸敝而不悟習  
亂安危忽不自覺或耽荒嗜欲不恤萬機或悅衆言莫

知所從或見信之臣懷寵苟免或疎遠之士言以賤廢  
是以紀綱弛而不振智士捐而不用悲夫自漢興以來  
三百餘年矣政令利瀆上下懈怠風俗彫弊人民偽巧  
百姓蹢然復思中興之功矣救世之術豈必堯舜而治  
哉期於紐絕拯撓去其煩惑而已是以受命之君創制  
改物中興之主匡時補失昔盤庚遷都以易殷民之弊  
周穆改刑而正天下之失俗人守古不達權變苟執所  
聞忽略所見焉可與論國家之事哉故言事者頗合聖

聽於今雖有可採輒見倚奪何者其碩士則闇於時權  
其達者則寡於勝負斯賈誼所以見悲於上世也雖使  
稷契猶不能行其志而況下斯者乎春秋之義量力而  
舉度德而行今已不能用三代之法故宜以霸道而理  
之重賞罰明法術自非上德嚴之則治寬之則亂其理  
然也為國之法有似理身平則致養疾則致攻故德教  
者治世之梁肉刑法者救亂之藥石也今以德除殘是  
猶梁肉治疾也欲望療除其可得乎自數世以來政多



恩貸御安轡馬而忘其銜四牡橫馳皇路險傾必將鉗勒鞭撻以救奔敗豈暇鳴鑾從容平路哉

袁宏曰觀崔寔之言未達王霸之道也常試言之夫禮備者德成禮順者情泰德苟成故能儀刑家室化流天下禮苟順故能影響無遺翼宣風化古之聖人知人倫本乎德義萬物由乎風化陶鑄因乎所受訓導在乎對揚崇軌儀於化始必理備而居宗明恭肅以弘治則理盡而向化斯乃君臣尊卑之基而德化和洽之本也是以

大道之行上下順序君唱臣和其至德風教繫乎一人  
政化行於四海無犯禮而王迹彰矣及哲王不存禮樂  
凌遲風俗自興戶皆為政君位且猶未固而況萬物乎  
於斯時也臣子自盡之日將守先王之故典則元首有  
降替之憂欲修封域之舊職則根本有傾拔之慮故忠  
奮之臣推其義心不忍其事思屏王室故有自下匡上  
之功以卑援尊之事雖失順序之道然效忠之迹也欲  
濟王體則異乎承宣之美邇同於不順而終有翼戴之

功故聖人因事作制以通其變而霸名生焉春秋書齊  
晉之功仲尼美管仲之勲所以囊括盛衰彌綸名教者  
也夫失仁而後義必由於仁失王而後霸以致於霸必  
出於忠義誠仁之不足然未失其為忠也推斯以觀則  
王霸之義於是見矣初上欲封大將軍梁冀使公卿會  
議其禮特進安樂侯胡廣太常羊儒司隸校尉祝恬太  
中大夫邊韶等稱冀之德宜比周公錫之山川封以附  
庸司空黃瓊議曰昔周公輔相成王制禮作樂是以大

啟土宇賜以山川郊祀天地行天子禮此百世未有唯  
周公宜之耳蕭何識高祖於泗上霍光輔昭宣於中興  
皆益戶增封以顯其功冀合食四縣賞賜皆如霍光使  
天下知賞必當功爵不越德冀恨之因地動策免瓊丁  
亥司空黃瓊以災異策免是月五色大鳥見己氏時以  
為鳳皇本志以政理衰缺梁冀專權皆羽孽之異也

二年正月丙辰京師地震四月甲寅孝崇皇后崩帝舉  
哀洛陽西鄉有司奏禮為人後制服有降公卿已下各

差贈送之禮儀比恭懷皇后是時大將軍梁冀輔政  
氏無在位者八月黃龍見句陽又見允街十月乙亥京  
師地震

永興元年五月丙申大赦天下十一月丁丑減天下人  
死罪一等民饑流亡數十萬口詔所在賑給太尉袁湯  
致仕湯字仲河初為陳留太守褒善敘舊以勸風俗嘗  
曰不值仲尼夷齊西山餓夫柳下東園黜臣致聲名不  
泯者篇籍使然也乃使戶曹吏追錄舊聞以為耆舊傳

數年薨追贈特進謚曰康侯子成左中郎將逢及隗並為三公太常胡廣為太尉太僕黃瓊為司徒

二年正月甲午大赦天下二月復聽刺史二千石行三年喪癸卯京師地震詔公卿舉賢良方正能直言極諫者各一人潁川荀淑對策譏切貴幸為梁冀所忌出為朗陵侯相吏民敬愛稱為神君焉淑字季和棄官隱居以壽終是時潁川鍾皓字季明以德行稱官至林慮長初皓為本郡功曹西門亭長陳寔未知名皓獨敬異焉皓

初辟公府太守問有誰可代君者皓曰明府必欲得其  
人西門亭長陳寔可也自是名重海內寔曰鍾君似不  
察人不知何獨識我潁川李膺嘗歎曰荀君清識難尚  
鍾君至德可師皓之嫂膺之姑也有子曰覲與膺同年  
而並有令名覲為人好學慕古有進退之行膺祖太尉  
修常言覲似我家性國有道不廢國無道免於刑戮者  
也復以膺妹妻之覲屢被辟命未嘗屈就膺謂覲曰孟  
軻以為人無是非之心非人也弟於是何太無皂白邪

觀嘗以腐言白皓曰元禮祖父在位諸從並盛又鍾為其甥故得然乎國武子好昭人過以為怨本豈其得保身全家

袁宏曰鍾生之言君子之道古之善人內修諸已躬自厚而薄責於人至其通者嘉善而矜不能其狹者正身而不及於物若其立朝為不得已而後明焉事至而應之非同人之短者也如得其情猶復託以烝糝使過而可得悔失而自新之路長君子道廣而處身之塗全矣



末世陵遲臧否聿興執銓提衡稱量天下之人揚清激濁繩墨四海之士於是德不周而怨有餘故君子道亢而無必全之體小人塗窮而有害勝之心風俗彫薄大  
路險巇其在斯矣六月乙丑封乳母馬惠子初為列侯  
九月丁卯朔日有蝕之太尉胡廣免司徒黃瓊為太尉  
光祿勳尹頌為司徒閏月蜀郡盜賊李伯自稱太初皇  
帝伏誅

永壽元年正月戊申大赦天下二月司冀民饑人民相

食詔所在賑給各有差時梁氏威勢傾天下而上無繼嗣災異數見潁陰人劉陶上疏曰蓋人非天地無以寓生天地非人無以為靈是故帝非民不立民非帝不寧夫天地之與帝帝之與民猶手之與足相須而行混同一體自然之勢也臣竊觀之今玄象錯度日月不明地裂川溢妖祥並興脣嗣仍絕民率流亡昔夏癸由此而廢商辛以斯而喪若不悔寤恐懼將無及矣伏惟陛下年隆德茂中天稱號襲常存之爵修不易之制目不視

鳴條之事耳不聞檀車之聲天災不即有痛於肌膚震  
蝕不即有損於已身故蔑三光之錯不畏上天之怒怡  
民饑之憂忽震裂之變輕無嗣之禍殆國家之命非所  
以彰美祖業克保天祉者也當今忠諫者誅諛進者賞  
嘉言結於忠舌國命在於讒口擅閭樂以咸陽授趙高  
以車府夫危非仁不扶亂非智不救故武丁得傳說以  
消鼎雉之變周宣用山甫以濟夷厲之荒竊見冀州刺  
史朱穆烏桓校尉李膺皆履正清修貞介絕俗穆前在

冀州彈糾豪傑埽滅饕惡肅清萬里不仁者遠雖山甫  
不畏彊禦誠無以逾也膺前後歷職正身率下及掌戎  
馬鎮撫北疆神武揚於朔州彊胡懾於漠北文既俎豆  
武亦干戈功遂身退家無私積斯則中興之良佐國家  
之柱臣也宜還本朝夾輔王室不合久屈間曹委於草  
莽臣恐小人道長遂成其敗犯冒天顏言誠非議知必  
以身脂鼎鑊為海內非笑所學之事將復何恨不干王孫  
於蜀都而學鬼斧於東齊不效猗頓之貨殖而習秦儀

之於周魏如此亦可以重王室之爵定天地之位矣臣  
始悲天下之可悲今天下亦悲臣之愚惑矣書奏上善  
其言六月匈奴叛中郎將張渙擊降之太常韓續為司  
空

二年春正月初聽中常侍行三年喪七月鮮卑寇雲中  
十月京師地震

三年春正月癸未大赦天下六月司徒尹頌薨司空韓  
續為司徒是時有人上書言人所以貧困者貨輕也欲

更鑄錢事下羣臣及太學之士時劉陶等在太學議曰夫讀鑄錢之詔下及幽微不遺窮賤是以藿食之人敢投書象魏聽罪絳闕蓋以為當今之憂不在於此在民有饑勞之怨海內無耳目之變乃箕子所謂佯愚而對也臣不達殷人佯愚之慮欲於不問而言甲子之事故念生鮮死久復不敢極諫陳其要請粗言生民之業夫食者有國之大寶生民之至貴也竊見比年以來良苗盡於蝗螟之口杼軸空於公孫之衣野無青草室如懸

罄所急朝夕之餐所患靡盬之事豈謂錢之鋌薄銖兩輕重哉今議者不達農殖之本多言鑄錢之便或欲因緣行詐以賈國利國利將盡取者爭競故造鑄錢之端於是乎生萬人鑄之一人奪之猶不能給設令一人鑄之則萬人奪之雖以陰陽為炭萬物為銅役不食之民使不饑之士猶不能足無厭之求也陛下聖德愍海內之憂感天下之難欲鑄錢齊貨以救其厄此猶養魚於沸鼎之中棲鳥於烈火之上夫水木本魚鳥之所生用

之不時必也焦爛當今地廣而不得耕民衆而無所食  
羣小競逐吞噬無厭誠恐卒有役夫窮匠起於板築之  
間投斤攘臂登高大呼則愁怨之人狼跳虎駭響應雲  
會八方分崩中夏魚潰雖方尺之錢不能救此若不早  
寤恐將及之上從之

延熹元年夏五月甲戌晦日有蝕之京都蝗六月大赦  
天下丙戌初置博陵郡誅侍中寇榮榮恂之曾孫辯絜  
自善少與人交以此見害於貴寵榮從兄子尚益陽長



公主帝又娶其從孫女於後宮左右益惡之乃陷榮以罪宗族遂免歸故郡吏持之急榮懼不免奔闕自訟未至刺史張敬追劾榮以擅去邊有詔捕榮榮亡命數年會赦令不得免窮困乃亡命山中上書曰臣聞天地之於萬物也好生帝王之於萬民也慈愛陛下統天理物作民父母自生育已上咸蒙德澤而臣兄弟獨為權門所嫉以臣昏姻王室謂臣將撫其背奪其位退其身受其勢於是造作飛章被以臣榮欲使墜於萬仞之坑踐

於必死之地陛下忽慈母之仁發投杼之怒有司承旨  
驅逐臣門臣輒奔走本郡沒齒無怨臣誠恐卒為豺狼  
橫見噬食故冒死詣闕披布肝膽刺史張敬好為諂諛  
張設機牢令陛下復興雷霆之怒司隸校尉應奉河南  
尹何豹洛陽令袁騰三官並驅若赴讎敵威加亡罪罰  
及朽骨但未掘壙出骸剖棺露胔耳殘酷之吏不顧無  
辜之害欲使聖朝必加罰於臣榮是以不敢觸突天威  
而自竄山林以陛下發神聖之聽啟獨見之明距讒慝

之謗絕邪巧之言救可濟之民援沒溺之命臣不意滯  
怒不為春夏息淹恚不為順時急布告遠邇求臣甚切  
張羅海隅置置萬里逐者窮人迹追者極車軌雖楚購  
伍員漢求季布無以復過也自臣遇罰以來三蒙赦令  
無厭之罰足以蠲除而陛下疾臣逾深有司咎臣轉力  
止則見埽滅行則為亡虜苟生則為窮民殛死則為怨  
鬼天廣而無以自覆地厚而無以自載蹈陸土而有沉淪之  
憂遠嚴墻而有鎮壓之患精誠足以感天而陛下不悟如臣

元惡大憝足備刀鋸陛下當班之市朝坐之王庭使三槐九棘平臣之罪無緣萬乘之前永無見信之期也勇者不逃死智者不毀名豈惜垂盡之命願赴湘沅之波故假須臾之期不勝首丘之情欲犯主怒觸帝禁伏於兩觀之下陳寫痛毒之冤然後登金鑊入沸湯雖死而不恨悲夫久生亦復何聊賴願陛下使臣一門頗有遺類以崇天地寬厚之惠謹先死陳情臨章泣血上不省遂滅寇氏

袁宏曰寇榮之心良可哀矣然終至滅亡者豈非命也哉性命之致古人豈肯明之其可畧言乎易稱天之所助者順人之所助者信然則順之與信其天之道乎得失存亡斯亦性命之極也夫向之則吉背之則凶順之至也推誠則通易慮則塞信之極也故順之與信存乎一已者也而吉凶通塞自外而入豈非性命之理致之由已者乎夫以六合之大萬物之衆一體之所棲宅猶秋毫之在馬背也其所資固小許處耳而賢者順之以通不肖者逆

之以塞彼之所乘豈異塗轍哉致之在已故禍福無門  
順逆之殊應也夫松竹貞秀經寒暑而不衰榆柳虛橈盡一  
時而零落此草木之性修短之不同者也廉潔者必有  
貪濁之對剛毅者必遇彊勇之敵此人事之對感時之  
不同者也咸自取之豈有為之者哉萬物之為莫不皆  
然動之由已應之在彼猶影響形聲不可得而差者也  
故君子之人知動靜為否泰致之在已也繕性治心不  
敢違理知外物之來由內而至故得失吉凶不敢怨天

夫然遇泰而不變其情遭否而不愠其心未嘗非已夫何悲哉

二年三月甲午絕刺史二千石三年喪六月鮮卑寇遼東度遼將軍李膺擊破之膺字元禮潁川襄城人初為蜀郡太守威德並行後轉護烏桓校尉會匈奴攻雲中殺略吏民膺親率步騎臨陣交戰斬首二千級羌寇遠退邊城安靜後以公事免官天子賢劉陶之言而嘉膺之能遷度遼將軍先時疎勒龜茲數抄張掖酒泉雲中

諸郡吏民苦之自膺在邊皆不復為害匈奴莎車烏孫  
鮮卑諸國常不賓附者聞膺威名莫不畏服先時略取  
民男女皆送還塞下遷河南尹司隸校尉膺風格秀整  
高自標持欲以天下風教是非為己任後進之士有升  
其堂者皆以為登龍門七月太尉黃瓊免太常胡廣為  
太尉丙午皇后梁氏崩乙丑葬懿獻梁皇后於是梁冀  
專權其同己者榮顯違忤者劾死百僚側目莫不從命  
省中咳唾之音冀必知之臺閣機事先以聞冀乃得奏



御內外恐懼上下鉗口而帝不得有所親任上既不平之矣冀以私憾專殺議郎邴尊上益怒之是時毫貴人見幸冀嫉其寵遣客夜盜其家欲刺貴人母母入宮求哀因言冀之罪八月癸酉上問小黃門唐衡曰左右誰與冀不相得者衡曰單超左悺前詣河南尹不疑禮敬極簡不疑收其兄弟送洛陽獄二人詣謝而得免徐璜具瑗常私忿梁氏放橫口不敢言於是上呼超悺入室上曰梁將軍兄弟專朝迫脅內外公卿以下從其風旨

今欲誅之於常侍意如何皆對誠為國賊當誅日久臣等弱劣未知聖意何如耳上曰審然者常侍密圖之對曰圖之易耳但恐陛下腹中狐疑上曰姦臣脅國當伏其罪復何狐疑於是令衡呼璜瑗五人遂於宅中定議上齧超臂出血以為盟超等曰陛下今計已定勿復更言恐為人所疑丁丑冀心疑超等使中黃門張憚入省宿以防其變瑗勅吏收憚以自外来謀圖不軌於是帝幸前殿召公卿勒兵遣使者收冀大將軍印綬更封北

景都鄉侯黃門令瑗將虎賁士千人與司隸共捕冀宗親洛陽獄無少長皆誅之冀自殺追廢懿獻后為貴人初上既與中官成謀乃召尚書令尹勲使任其事上素惡冀倉卒恐不能辦勲臨事明斷甚有方略冀既誅上嘉其能坐冀所連及公卿列侯校尉刺史二千石死者數十人冀故吏賓客免絀者三百餘人朝廷為之一空唯光祿勲王躬廷尉邯鄲義在焉是時從禁中發使者交馳道路公卿失其度州府市朝閭里鼎沸數日乃定

百姓莫不稱快冀財貨已充王府用減天下租稅之半  
先時立名行高節之士多遭梁冀之害免身苟容而已  
莫敢潔去就矣唯周協不屈其志而獨能自免於難故  
士以此服之也協字巨勝周舉之子立虛養道以典墳  
自娛初以父任為郎自免歸徵辟不就杜門不出十餘  
年及延熹初乃開門延客遊談宴樂是秋梁冀誅而協  
亦病卒識者以為知命初冀之盛也尚書陳霸上疏言  
其罪請誅之上不省霸知為冀所害七日不食而死戊

寅太尉胡廣司徒韓續以阿附梁冀減死一等壬午立  
皇后亳氏實鄧后也后即鄧香之女香則禹之孫初后  
母宣起於微賤間香生后後適梁紀故后冒姓梁氏紀  
姉子孫壽冀之妻也進后入掖庭有寵立為皇后惡梁  
姓之同改為亳氏封宣為長安君追尊香為車騎將軍  
安陽侯宣子演封南頓侯位特進后復姓鄧氏徙宣為  
昆陽君演子康北陽侯賞賜巨萬封平梁冀之功也白  
馬令李雲上書移副三府曰故大將軍梁冀雖持權日

久今得誅之猶名家臣殪而殺也而猥封謀臣萬戶高  
祖聞之得無見非西北列將得無解體孔子曰帝者諦  
也今官位錯亂小人日進財貨公行政治日消是帝欲  
不諦乎上得雲奏大怒送雲黃門北寺使中常侍管霸  
與御史廷尉雜考之弘農五官掾杜衆傷雲以忠獲罪  
上書願與同日死帝愈怒遂并下廷尉廷尉奏雲不遜  
欲獲抗直之名衆遠為邀訴皆大逆不道請論如律霸  
入奏上在濯龍池霸跪言曰雲野澤愚夫衆郡中小吏

出於狂慙不足加罪上謂霸曰使帝欲不誅是何等語而常侍欲原之邪顧小黃門吳伉可其奏大鴻臚陳蕃上疏救雲曰臣聞所言雖不識禁忌干上其意歸於憂國但違將順之禮禮譏暴諫然亦有狂狷愚忠不顧誅族之禍者古今有之是以高祖忍周昌不諱之言孝成皇帝赦朱雲腰領之誅二主非不愆此二臣以忠不思難皆不罪之今日殺李雲天下猶言陛下誅諫臣所以臣敢觸龍鱗也上不從雲衆死獄中蕃免歸田里

袁宏曰夫欲之則至仁心獨行人君之所易人臣之所難也動而有悔希意循制人臣之所易人君之所難也古之君臣必觀其所易而閑其所難故上下恬然莫不雍睦逮於末世斯道不存君臣異心上下乖違各行所易不顧其所難難易之事交而諫爭之議生也夫諫之為用政之所難者也處諫之情不同故有三科焉推誠心言之於隱貴於誠入不求其功諫之上也率其所見形於言色面折庭爭退無後言諫之中也顯其所短明



其不可彰君之失以為已名諫之下也夫不吝其過與  
衆攻之明君之所易庸主之所難觸其所難暴而揚之  
中諫其猶致患而況下諫乎故諫之為道天下之難事  
死而為之忠臣之所易也古之王者辨方正位各有其  
事在朝者必諫在野者不言所以明職分別親疎也忠  
愛心至釋耒而言者王制所不禁也無因而建直言其道  
難行故君子罕為也十月行幸長安祠章陵壬寅中常  
侍單超為車騎將軍十二月西戎犯塞護羌校尉段熲


討之天竺國來獻故太尉黃瓊為太尉光祿大夫祝恬  
為司徒詔曰太尉黃瓊清儉不撓數有忠謇加以典謀  
深與有師傅之義連在三司不阿權貴疾風知勁草朕  
甚嘉焉其封瓊祁鄉侯瓊固讓不聽是時新誅梁冀天  
下想望異政故瓊首為三公多奏州縣諸不法死徙者  
十餘人海內翕然副其耳目上委任之會單超等五侯  
擅權瓊自度力不能制乃稱疾不朝上表曰臣聞天者  
務剛其氣君者務彊其政是以王者居高履貴則以德

義為首臨危處難則以忠賢為助故能長守萬國保其社稷而陛下即位以來諸梁秉政官豎充朝富擬王公勢傾海內言之者輒族滅稱之者必顯榮忠臣懼死而杜口萬夫畏禍而括囊故太尉李固杜喬以直言干政遂見殘滅賢愚傷心故白馬令李雲指言宦官以忠獲罪是使天下結舌以忠為諱也徐璜唐衡單超具瑗等於梁冀之盛苟免相連及其當誅說以要賞陛下不復澄清善惡俱與忠臣尚書令尹勲等並時顯封使朱紫

不別粉墨雜糅所謂銷金玉於沙礫碎珪璧於泥塗四方間之莫不叩心傷陛下失賞於見誣虧爵於姦臣夫讒諛相與無高而不升阿黨相抑無深而不淪陛下年在方剛聖慮未衰願還既誤之封折后族之勢夫懷寶者須世抱璞者待時陛下誠能行臣所陳則懷寶抱璞之徒特將竭力致身以趨聖世臣身輕任重勤不補過敢以垂死之年陳不諱之言庶有萬分無恨三泉

三年正月丙申大赦天下丙午車騎將軍單超薨閏月

羌寇張掖護羌校尉段熲討之五月甲戌詔曰汝南太守張彪故河南尹鮑吉與朕有潛龍之舊皆封列侯六月辛酉司徒祝恬薨光祿勳种暭為司徒九月泰山盜賊羣起十二月中郎將宗資討之



後漢紀卷二十一

欽定四庫全書

史部

後漢紀卷二十三

詳校官編修

臣

范來宗

洗馬臣王坦修覆勘

總校官編修

臣

王燕緒

校對官檢討

臣

李學錦

謄錄監生

臣

費恩綸

欽定四庫全書

後漢紀卷二十二

晉袁宏撰

孝桓皇帝紀第二十二

四年春正月辛丑南宮嘉德殿火二月壬申武庫火夏四月甲寅河間孝王開子博為任城王五月有星孛于大辰丁卯源陵長壽門火六月羌寇金城安定漢陽武威殺吏民中郎將皇甫規討羌大破之先是涼州刺史

郭宏漢陽太守趙喜安定太守孫俊皆不任職倚恃貴戚有司不敢糾規悉條奏其罪羌人聞之翕然乃喜一時降者二十餘萬口徵拜議郎論功未畢常侍左悺私求于規規執正不許悺遂以餘寇不絕收規下獄學生張鳳等三百餘人守闕訟規終不省規竟坐論會赦復徵為尚書頃之復為中郎將討梁益叛羌有功封喜城侯固讓不受規字威明安定朝那人初譏切梁氏謝病歸教授十餘年冀既誅旬月之間禮辟五至皆不就公



車徵乃起為泰山太守規好推賢達士太傅陳蕃太尉  
楊秉長樂少府李膺太守張奐皆規所教授致顯名于  
時秋八月占賣關內侯羌寇張掖酒泉尚書令陳蕃薦五處士  
曰臣聞善人者天地之紀治之所由也詩云思皇多士  
生此王國天誕俊乂為陛下出當輔明時左右大業者  
也處士豫章徐穉彭城姜肱汝南袁閎京兆韋著潁川  
李曇德行純備著于民聽宜登論道協亮天工終能翼  
宣威德增光日月者也詔公車備禮徵皆辭疾不至穉

字孺子豫章南昌人也家貧嘗自耕稼非其衣不服非其力不食恭儉義讓非禮不言所居服其德化道不拾遺陳蕃嘗為豫章太守以禮請署功曹穉為之起既謁而退蕃歸之粟受而分諸隣里舉有道起家拜太原太守皆不就諸公所辟雖不就其有死喪者負笈徒步千里赴弔斗酒隻雞藉以白茅酹畢便退喪主不得知也初穉少年遊國學中江夏黃瓊教授于家故穉從之諮訪大義瓊後仕進位至三司穉絕不復交及瓊薨當葬

穉乃往赴弔進酹哀哭而去人莫知者時天下名士四方遠近無不會者各言聞豫章徐孺子來何不相見推問喪宰曰頃寧有書生來邪對曰先時有一書生來衣麕薄而哭之哀不記姓字僉曰必孺子也于是推選能言語者陳留茅季偉候相相見酤酒市肉穉為飲食季偉請國家之事穉不答更問稼穡之事穉乃答之季偉還為諸君說之或曰孔子云可與言而不與言失人穉其失人乎郭林宗曰不如君言也孺子之為人也清潔

高廉饑不可得食寒不可得衣而為季偉飲酒食肉此  
為已知季偉之賢故也所以不答國事者是其智可及  
其愚不可及也何不知之乎是時宦豎專政漢室寢亂  
林宗周旋京師誨誘不息稱以書誠之曰大木將顛非  
一繩所維何為棲棲不遑寧處林宗感悟曰謹拜斯言  
以為師表姜肱字伯淮彭城廣戚人隱居靜處非義不  
行敬奉舊老訓導後進常與小弟季江俱行為盜所劫  
欲殺其弟肱曰弟年穉弱父母所矜又未聘娶願自殺

以濟家弟季江復言曰兄年德在前家之英俊何可害之不如殺我我頑闇生無益于物沒不損于數乞自受戮以代兄命二人各爭死于路盜戢刃曰二君所謂義士棄物而去肱車中尚有數千錢在席下盜不見也使從者追以與之盜感之亦復不取肱以物已歷盜手因以付亭長委去舉有道方正皆不就袁閎字夏甫太傅安之玄孫自安至閎四世三公貴傾天下閎玄靜履貞不慕榮宦身安茅茨妻子御糟糠父為彭城太守喪官

閤兄弟五人常步行隨柩車號泣晝夜從叔逢隗並為  
公輔前後贈遺一無所受二公愆之至于州府辟召州  
郡禮命皆不就韋著字休明京兆杜陵人隱居講授不  
修世務李曇字子雲潁川陽翟人少喪父事繼母繼母  
酷烈曇奉逾謹率妻子執勤苦不以為怨曇身耕農以  
奉供養得四時珍玩未嘗不先拜而後進母鄉里有父  
母者宗其孝行以為法度徵聘不應唯以奉親為歡夏  
四月戊辰虎賁掖門火五月康陵園火武陵蠻夷反車

騎將軍馮緄討之緄上書曰夫勢得容姦伯夷可疑不  
得容姦盜跖可信樂羊伐中山反而語功文侯示以謗  
書一篋願請中常侍一人監軍財費尚書朱穆奏曰臣  
聞出郊之事將軍制之所以崇威信合事宜也即緄有  
嫌不當荷任即緄無嫌義不見疑樂羊戰國陪臣猶賴  
見信之主以全其功況唐虞之朝而有猜嫌之事哉緄  
設虛端以自阻衛為臣不忠帝寢其奏穆又上書言漢  
故事中常侍或用士人建武以來乃悉用宦者延平已

來寔益貴盛假貂璫之飾任常伯之職天朝政事一更  
其手權傾天下寵逼人主子弟親戚並荷職任放濫驕  
逸莫能禁禦無行之徒媚求官爵恃勢驕寵漁食百姓  
臣以為可皆遣罷率由舊章博選天下清純之士達國  
體者以補其虛即陛下可為堯舜之君衆僚皆為稷卨  
之臣矣上不從穆後復見口陳奏上不悅穆伏不起左右  
叱穆出于是宦者更共稱詔以詰讓穆憤激發疽而卒  
公卿以穆立節忠清守死善道宜蒙旌寵以勸忠勤乃



追贈益州刺史穆字公叔南陽宛人初為冀州刺史始  
濟河長史解印去者四十餘人中常侍趙忠喪父斂為  
璵璠玉匣穆下郡考正乃至發墓視尸其家稱冤自訴  
穆坐徵詣廷尉髡輸左校後得原歸家頃之朝臣多為  
穆訟寃由是徵命議郎尚書十一月武陵蠻夷降

六年春正月戊午司徒种暠薨大鴻臚許邛為司徒暠  
字景伯河南洛陽人父早亡有財三十萬暠皆以賑鄉  
里貧者當時豪貴莫不遂識知之年四十四縣始召為

門下吏時河南尹田歆外甥王譔名知人歆謂之曰河南當舉六孝廉皆得貴人書命不宜相違欲以五副之自舉一清名堪成就者上以報國下以託子孫汝助我索之譔答曰知臣莫若君君為二千石當清察郡中詢于賢良譔安得知之歆曰郡中所送固凡庸耳欲因汝之明求人之所不知而有奇者耳明日譔東出送客駐車太陽郭裏見暁還語歆曰為君得孝廉矣問居何山答曰洛陽門下吏也歆笑曰當得隱滯之夫乃洛陽吏

邪答曰夫異士必居山谷但其居處異耳德未必有也  
處人間而有異而人不知已獨知之乃奇耳若不相信  
可召而與之言歆便于府召見于庭中詰問職事長吏  
所施行畧分別具對皆有條理乃署主簿功曹舉孝廉  
由是知名二月戊戌大赦天下夏四月辛亥康陵東署  
大火秋七月甲午平陵園寢火十月上廣城校獵光祿  
勲陳蕃上書諫曰臣聞人主有事于苑囿唯西郊順時  
講武以殺屬助祭盡孝敬之道也違是則為逸遊肆樂

情意故臯陶誡舜曰無敢遊佚周公誡成王曰無盤遊  
于田虞舜成王猶有此誠況德不及二主者哉當今兵  
戈未戢是陛下焦心坐而待旦之時也而不以是乃揚  
旌旗之耀騁輿馬之觀非聖賢恤民之意者也上不納  
七年春二月太尉黃瓊薨瓊字世英江夏安陸人清貞  
守正進止必以禮居宰相位廉平公正數納讜言為朝  
廷所重上亦愍惜焉贈車騎將軍祁鄉侯印綬謚曰昭  
侯有孫曰琬三月癸亥殞石於右扶風太常楊秉為太

尉是時中常侍侯覽具瑗驕縱最甚選舉不實政以賄成秉奏覽等佞諂便辟竊國權柄名樹姦黨賊害忠良請免官理罪奏入尚書詰秉曰夫設官分職各有司存三公統外御史察內今越左右何所依據其開公具對秉便對曰除君之惡惟力是視鄧通失禮申屠嘉召而責讓文帝從而請之漢故事三公鼎司無所不統尚書不能詰上不得已乃免覽官瑗削國秉於是奏免刺史郡守以下二十餘人皆民之蠹也夏四月乙丑封皇后

弟鄧庾為育陽侯秋九月武陵蠻夷叛寇掠數郡荊州  
刺史度尚討之將戰尚召治中別駕曰今後無轉輸前  
有彊敵吏士捷獲已多緩之則不肯力戰急之則事情  
切迫潛有逃竄今與諸君俱處虎口勝則功成敗則無  
餘為之奈何諸從事者莫知所出尚宣言曰今兵實少未  
可進當復須諸郡兵至且各休息聽其射獵軍中喜踊  
大小皆出尚密呼所親燔其積聚獵者還莫不涕泣尚  
使人慰勞曰蠻人多寶足富數世諸卿但不并力耳所

亡何足介意其明旦秣馬蓐食徑赴屯城賊見尚晏然  
不圖其吏士憤激遂克殄之封尚右鄉侯除一子為郎  
尚字博平山陽湖陸人也初為上虞長糾摘姦伏縣中  
謂之神明擢門下書佐朱俊謂之幹世之才俊後顯名  
終如尚言縣有孝女曹娥年十四父盱溺于江不得尸  
娥號慕不已遂赴江而死前後長吏莫有紀者尚至官  
改葬娥樹碑表墓以彰孝行縣民故洛陽市長淳于翼  
學問淵深大儒舊名常隱于田里希見長吏尚往候之

晨到其門翼不即相見主簿曰還不聽停車待之翼晡  
乃見尚尚宗其道德極談乃退其優賢表善皆類此也  
冬十月行幸章陵祠舊宅遂有事于陵廟戊辰行幸于  
雲夢臨水祠湖陽新野公主張敬侯魯哀公廟是時勃  
海王悝驕慢僭侈不奉法度見上無子陰有嗣漢之望  
北軍中候史弼上疏曰臣聞帝王之於親戚愛之雖隆  
必示之以威禮寵之雖貴必示之以法度如是則和親之  
道興骨肉之情固昔襄王忍甘昭公孝景皇帝驕梁孝



王二弟階寵卒用悖慢周有播蕩之禍漢有袁盎之變  
竊聞勃海王惺恃至親之屬藉偏私之愛有僭慢之心  
頗不用制度外聚輕薄不逞之徒內荒酒色出入無常  
所與羣居皆家之棄子朝之斥臣有口無行必有羊勝  
伍被之類州司不敢彈糾傳相不能匡輔陛下寬仁隆  
於友于之義不忍遏絕恐遂滋蔓為害彌大乞露臣奏  
宣示百僚使議于朝明言其失然後詔公卿平處其法  
法決罪定乃下不忍之詔臣下固執然後少有所許如

是則聖主無傷親之議勃海長有享國之祚不然懼大  
獄將興使者相望于道矣上以至親不問其事弼字公  
謙陳留考城人歷職忠謇無所傾撓自尚書為平原太  
守詔書下諸郡察黨人時所在怖懼皆有所舉多至數  
千人弼獨上言無黨人從事主者坐問責曰詔書憎嫉  
黨人極惡至諸郡皆有平原何獨無弼對曰先王疆理  
天下畫為九壤物土不同風俗亦異他郡自有平原自  
無胡可相比若趨諾詔書誣陷忠良平原之人皆為黨

乎從事大怒奏弼罪以贖免遷河東太守弼初至郡敕  
門下有請一無所通常侍侯覽遣諸生齎書求假鹽稅  
及有所屬門長不為通生詐稱自言者以見弼弼怒收付  
獄即日考殺之覽後以誣弼謗誹朝政徵詣廷尉論棄  
市平原吏民走詣闕訟弼得減死一等刑竟歸田里後  
數為公卿所薦拜彭城相為政務抑豪強雖有縱放然  
豪右斂手小民有罪率多恩貸

八年春正月使中常侍左悺之苦祠老子上始好神仙

之事勃海王惺謀反徙為定陶王丙申晦日有食之詔  
公卿校尉舉賢良方正各一人河南劉淑對曰臣聞立  
天之道曰陰與陽立人之道曰仁與義故夫婦正則父  
子親父子親則君臣通君臣通則仁義立仁義立則陰  
陽和而風雨時矣夫吉凶在人水旱由政故勢在臣下  
則地震坤裂下情不通則日月失明百姓怨恨則水旱  
暴興主上驕淫則澤不下流由此觀之君其綱也臣其  
紀也綱紀正則萬目張君臣正則萬國理故能父慈子

孝夫信婦貞兄愛弟順如此則陰陽和風雨時萬物得  
所矣癸未廢皇后鄧氏后驕忌嘗與上所幸郭貴人更  
相譖訐由是故以廢憂死親屬皆免歸本郡三月辛巳  
大赦天下夏四月丁巳壞諸淫祀壬戌河水清五月丙  
戌太尉楊秉薨秉字叔節少傳父業隱居教授三十餘  
年乃應司空之辟稍遷刺史二千石所歷皆有政績雖  
三公之子經歷州郡嘗布衣蔬食老而不改在公卿位  
朝廷每有得失便盡心正諫退而削草雖子弟不知也

秉不飲酒早喪夫人遂不復娶所在以神明稱嘗曰我  
有三不惑財酒色有子曰賜亦顯名儒行六月匈奴寇  
邊郎將度尚擊之九月京師地震冬十月丙寅太中大  
夫陳蕃為太尉蕃讓曰不僭不忘率由舊章臣不如太  
常胡廣齊七政訓五典臣不如議郎王暢文武兼資折  
衝萬里臣不如弛刑司隸李膺上不許蕃又上書曰臣  
聞昔齊桓公任管仲將正諸侯先治政令今寇賊在外  
四肢之疾耳臣竊寢不能寐食不能飽憂陛下內政未

治忠言日疎前梁冀五侯弄權天啓陛下收而戮之當時天下號為小清其前監未遠旋起覆車之軌矣往年地動日蝕火災皆陰盛之應願陛下割塞左右豫政之原引納尚書朝省之事簡練高潔斥退佞邪如此則天和于上地洽于下矣從陛下踐祚以來大臣誰敢舉左右之罪往者申屠嘉召鄧通文帝遣詣嘉府乃從而請之三公之職何所不統但今左右驕恣欲令三公不得舉筆臣舊今擢自閭閻特為陛下日月所照奈何受恩

如臣而當避難苟生不敢正言陛下雖厭臣毒言人臣有自勉強書奏上不悅愈以疾蕃辛巳立皇后竇氏初憲之誅家屬廢為庶民武字游平少有學行常閒居大澤不交世務諸生自遠方來授業百餘人名聞關西武生五男二女長男紹次機次恪長女妙即后也上以武三輔大族武有盛名后入掖庭逾月立為皇后武甚不樂與疾至京師拜武為特進城門校尉封槐里侯紹為虎賁中郎將武乃稱疾篤固辭爵位勃海盜賊蓋登自稱



太上皇帝伏誅十二月使中常侍管霸之苦祀老子

九年春正月沛國盜賊戴異自稱上皇帝伏誅辛酉太  
常胡廣為司徒三月辛巳京師夜有火光轉相驚譟夏  
四月庚午河水清平原人襄楷詣闕上書曰臣聞天不  
言者以文象設教臣竊見往年五月熒惑入紫微犯帝  
座其閏月太白犯房心於占天子凶三月洛陽城中夜  
無故有火光人聲正喧於占皆不出三年天子當之春  
夏已來皆有繁霜皆用刑酷急不當罪使之然也自陛

下即位以來誅寇氏孫氏鄧氏其從坐者非一李雲之  
死天下知其冤也自漢興以來未有諫主被誅用刑太  
深如今者也昔文王能以一妻享十子之祚今陛下宮  
女千人不如文王之一妻者明刑重而無德也臣聞布  
穀聞於孟夏蟋蟀吟於始秋物有微而至信人有賤而  
必忠臣雖極賤思效愚誠願賜清閒極盡所言上即詔  
尚書召問楷曰臣聞古者本無宦臣孝武末春秋高數  
遊後宮始置之耳後稍見任至孝順帝時遂益昌熾也

案天市内宦者四星不在太微中而在市中明宦者但當侍不得預内今乃處古常伯之位決謀於中傾動内外恐非天意也天子以楷章及對下有司尚書奏自古有宦者之官非近世所置漢初張澤為大謁者佐絳侯孝文帝使趙談參乘而子孫昌盛今楷不陳損益而務析言破律違背經義偽託神靈於是論楷司寇戊寅特進竇武為大將軍武移疾洛陽都亭固讓至于數十詔公車勿復通章武惶恐不得已就職在公肅而不猛其

所交友若陳仲舉李元禮等皆為之議論而訪政事焉  
妻子惡衣服車馬苟全而已卑身正己率宗族内外僮  
僕莫敢違法者六月庚午祀老子濯龍中用夜郊而樂  
鮮卑烏孫寇邊匈奴中郎將張奐擊降之時自宦者專  
權在位子弟親屬及苟進之士連結依附以取榮寵乘  
勢肆意陵暴天下於是善人君子懼人倫虧廢發憤忘  
難初陽翟令張興黃門張讓弟也多殺無辜賊餘千金  
李膺初為河南尹收興考殺之尚書詰膺曰尹視事無

幾而多殺伐乎膺對曰昔孔子為魯司寇七日誅少正  
卯于兩觀之下今臣列官已積二旬私懼稽留為憊反  
獲連疾之譏膚受之愬以闕聖聽自知罪死期不旋踵  
然臣愚計乞留五月尅殄元惡然後退就湯鑊始生之  
願也上不省論輸左校頃之起家為司隸校尉振綱直  
繩多所摧戮河東太守單安河內太守徐盛中常侍單  
超徐璜之弟也憑寵干紀瀆貨害政沛國朱寓嘗為司  
隸校尉奏安盛曰此等皆宮豎昆叔刀鋸之餘橫蒙恩

私剖符三河不能思展命力以答天地敢張豺狼之口  
吞噬百姓之命罪深墨重人鬼同疾臣銜命操斤翦其  
兇醜輒考核賊罪事皆伏上詔安盛廷尉治罪汝南人  
范滂字孟博郡召為功曹即褰衣就車急於救時也進  
善退惡風教肅然郎中不便者咸共疾之所舉者謂之  
朋黨後為太尉黃瓊所辟登車攬轡有澄清天下之志  
受詔使冀州守令聞滂名其有贓汙未發者皆解印綬  
去滂舉刺史二千石二十餘人罪惡者皆權豪之黨也

尚書詰滂曰所舉無乃猥多恐有冤疑其更詳核勿拘  
于前滂對曰臣之所舉自非饕穢姦罪豈以汚臣簡札  
臣以會日促迫故先舉所聞其未審者方當參實以除  
凶類臣聞農勤于除草故穀稼豐茂忠臣務在除姦故  
王道肅清滂觀時方艱難知其志不行乃投刺而去於  
是中人心懼懷謀害正矣山陽人張儉字元節以正直  
知州舉秀才刺史非其人謝病不起太守翟超臨郡請  
為東部督郵儉解巾應之儉舉劾中常侍侯覽前後請

奪民田三百餘頃第舍十六區皆高樓四周連閣洞殿  
馳道周旋類于宮省豫作壽冢石椁雙闕高十餘丈以  
準陵廟破人居發掘冢墓及虜掠良人妻婦女皆應  
沒入儉比上書為覽所遮截卒不得上儉行步至平陵  
逢覽母乘軒道從盈衢儉官屬呵不避路儉按劒怒曰  
何等女子干督此非賊邪使吏卒收覽母殺之追擒覽  
家屬賓客死者百餘人皆僵尸道路伐其園宅并埋木  
刊雞犬器物悉無餘類覽素佞行稱冤于上曰母及親



屬無罪橫為儉所殘害皆大將軍竇武前太尉掾范滂所  
諷上以儉郡吏不先請奏擅殺無辜徵付廷尉詔收儉  
儉乃亡命逃竄吏捕之急儉與魯國孔褒有舊後事發  
覺儉走至東萊李篤家督郵毛欽操兵至篤家引欽就  
席曰明廷何為枉駕自屈欽曰張儉負罪入君門是以  
來耳篤曰儉負罪亡命篤豈得藏之若審在此此人名  
士明廷寧宜執之欽因起撫篤背曰遽伯玉恥獨為君  
子足下為仁義奈何獨專美邪篤曰今欲分之明廷載

半去矣歛嘆息而去篤道儉經北海戲子然家送入漁陽出塞得免其所經歷子然之徒皆伏誅儉親屬內外並皆滅盡于是佞幸內憾媚上思報矣初河內張成道術士也知當大赦使女殺人李膺之為司隸收成殺之是秋瓚等教成弟子牢順上書曰司隸李膺御史中丞陳蕃汝南范滂潁川杜密南陽岑暉等相與結為黨誹謗朝廷迫脅公卿自相薦舉三桓專魯六卿分晉政在大夫春秋所譏九月詔收膺等三百餘人其逋逃不獲

者懸千金以購之使者相望于道其所連及死者不可勝數而黨人之議始于此矣上使中常侍王甫治黨事太尉陳蕃曰所考者皆憂國患時當官不撓是何罪而乃爾邪不肯署名上不從遂皆下獄獄吏曰諸人入獄者當祭臯陶酒范滂曰臯陶古之直臣如滂無罪乃理滂于天如其有罪祭之何益衆人聞之皆不祭臈等皆三木囊頭伏于階下王甫次在後因越前對問曰合黨連羣必有盟誓其所圖謀皆何等邪悉以情對滂曰竊

聞仲尼之言見善如不及見不善如探湯欲使善善齊其清惡惡同其汙謂王政之所願聞不悟反以為黨王甫曰卿輩皆相拔舉迭為脣齒其不合則見排擯非黨而何滂乃仰天曰古之修善自求多福今之修善乃陷大戮死之日願賜一畚薄埋滂于首陽山側上不負于皇天下不媿于伯夷叔齊甫為之改容即解桎梏去囊頭尚書霍諝以為黨事無驗表諫赦之皆歸田里滂發京師道路迎者數千人滂謂友人殷仲子黃子敬曰今

子相隨是重吾禍也遂逃歸鄉里焉陳留人夏馥字子  
治安貧樂道不求當世郡內多豪族奢而薄德未嘗過  
門躬耕澤畔以經書自娛由是為豪勢所非而馥志業  
逾固為海內所稱諸府交辟天子立纁徵皆不就嘗奔  
喪經洛陽歷太學門諸生曰此太學門也馥曰東野生  
希遊帝王之庭徑去不復顧公卿聞而追之不得而見  
也黨事之興馥名在捕中馥乃髡髭髮易姓名匿迹遠  
竄為人傭賃馥弟靜駕車馬載絹餉之於滏陽縣客舍

見顏顏色毀瘁不能復識也聞其聲乃覺之起向之拜  
顏避之不與言夜至靜所呼靜語曰吾疾惡邪佞不與  
交通以此獲罪所以不恥饑寒者求全身也奈何載禍  
相餉也明旦各遂別去以獲免於是袁閔築室於庭曰  
予室中東向拜母去前後門戶及母喪亦不制服位如  
此十五年卒以壽終是時太學生三萬餘人皆推先陳  
蕃李膺被服其行由是學生同聲競為高論上議執政  
下譏卿士范滂岑暉之徒仰其風而扇之於是天下翕

然以臧否為談名行善惡託以謠言曰不畏彊禦陳仲  
舉天下模楷李元禮公卿以下皆畏莫不側席又為三  
君八俊八顧八及之目猶古之八元八凱也陳蕃為三  
君之冠王暢李膺為八俊之首海內諸為名節志義者  
皆附其風膺等雖免廢名逾盛希之者惟恐不及涉其  
流者時雖免黜未及家公府州郡爭禮命之申屠蟠嘗  
遊太學退而告人曰昔戰國之世處士橫議列國之王  
爭為擁彗先驅卒有坑儒之禍今之謂矣乃絕迹于梁

碭之間居三年而滂及難

袁宏曰夫人生合天地之道感于事動性之用也故動用萬方參差百品莫不順乎道本乎情性者也是以為道者清淨無為少思少欲沖其心而守之雖爵以萬乘養以天下不榮也為德者言而不華默而有信推誠而行之不媿于鬼神而況于天下乎為仁者博施兼愛崇善濟物得其志而中心傾向之欣然忘已以為千載一時也為義者潔軌迹崇名教遇其節而明之雖殺身糜軀猶



未悔也故因其所弘則謂之風節其所託則謂之流自  
風而觀則同異之趣可得而見以流而尋則好惡之心  
于是乎區別是以古先哲王必節順羣風而因物之流  
道之而各使自盡其業故能班叙萬物之才以成務經  
綸王畧直道而行者也中古陵遲斯道替矣上之才不  
能以至公御物率以所好求物下之人不能博通為善  
必以合時為貴故一方通而羣方塞矣夫好惡通塞萬  
物之情也背異傾同世俗之心也中智且猶不免而況

常人乎故欲進之心斐然向風相與矯性違真以徇一時之好故所趨不必同而不相非則風俗遷矣春秋之時禮樂征伐霸者迭興以義相持故道德仁義之風往往不絕雖文辭音制漸相祖習然憲章軌儀先王之遺也戰國縱橫强弱相陵臣主側席憂在危亡無不曠日持久以延名業之士而折節吐誠以招救溺之賓故有開一說而饗執珪起徒步而登卿相而遊說之風盛矣高祖之興草創大倫解赭衣而為將相舍介冑而居廟

堂皆風雲豪傑崛起壯夫非有師友淵源可得而觀徒以氣勇武功彰于天下而任俠之風盛矣逮乎元成明章之間尊師稽古賓禮儒術故人重其學各自是其業徒守一家之說以爭異同之辨而守文之風甚矣自茲以降主失其權閹豎當朝佞邪在位忠義之士發憤忘難以明邪正之道而肆直之風盛矣夫排憂患釋疑慮論形勢測虛實則遊說之風有益于時矣然猶尚譎詐明去就間君臣疎骨肉使天下之人專制利害弊亦大

矣輕貨財重信義憂人之急濟人之險則任俠之風有  
益于時矣然樹私惠要名譽感意氣讐睚眦使天下之  
人輕執政之權弊亦大矣執誠說修規矩責名實殊等  
分則守文之風有益于時矣然立同異結朋黨信偏學  
誣道理使天下之人奔走爭競弊亦大矣崇君親黨忠  
賢潔名行厲風俗則肆直之風有益于時矣然定臧否  
窮是非觸萬乘陵卿相使天下之人自置于必死之地  
弊亦大矣古之為政必置三公以論道德樹六卿以議

庶事百官箴規諷諫閭閻講肄以修明業於是觀行于鄉閭察議于親鄰舉禮于朝廷考績于所蒞使言足以宣彼我而不至於辯也義足以通物心而不至於為佞也學足以通古今而不至于為文也直足以明正順而不至于為狂也野不議朝處不談務少不論長賤不辯貴先王之教也傳曰不在其位不謀其政天下有道庶人不議此之謂矣苟失斯道庶人干政權移于下物競所能人輕其死所以亂也至乃夏馥毀形以免死袁閎

滅禮以自全豈不哀哉時諸黃門無功而侯者多大將軍  
竇武上表曰陛下即位以來梁孫鄧亳貴戚專勢侵逼  
公卿略驅士民惡稔罪深或誅滅相屬以常侍黃門竊  
弄王命欺罔競行謗讟爭入如忠臣李固杜喬在朝必  
竭忠奉之節覺其姦萌因造妖言陷之禍門陛下不察  
加以大戮冤感皇天痛入后土賢愚悲悼小大傷摧固  
等既沒宦黨受封快兇慝之心張豺狼之口天下咸言  
直如弦死道邊曲如鉤封公侯謠言之作正為此陛

下違漢舊典謂必可行自造制度妄爵非人今朝廷日  
衰姦臣專政臣恐有胡亥之難在于不久趙高之變不  
朝則夕臣實懷愚不憚瞽言使身死名著碎體糞土薦  
肉狐鼠猶生之年雖尊官厚祿不以易之也謹冒死陳  
得失之要凡七十餘條伏惟陛下深思臣言東骸候誅  
武數進忠言辭旨懇惻李膺等被赦由武申救之也

永康元年春正月西羌寇三輔夫餘夷王寇玄菟夏四  
月中郎將張奐以南單于車兒不能治國事上言更立

左鹿蠡王都紺為單于詔曰春秋大居正車兒一心  
向化何罪而黜其遣還廷攝部落五月壬子晦日有食  
之六月甲寅詔公卿校尉舉賢良方正各一人潁川荀  
爽對策曰臣聞火生于木故其德孝漢之謚帝稱孝者  
其義取此也故漢制使天下皆講孝經選吏能舉孝廉  
皆以孝為務也夫喪親自盡孝之終也今二千石不得  
終三年喪恐非所以為孝道而稱火德也頃者脩嗣數  
乏本枝不繁其咎未必不由此往者孝文勞謙自約行



過乎儉故有遺詔以日易月此謂夷惠激俗適身而已  
不可貫之萬世為後嗣德者也雖古今損益未能諒陰  
可存其禮以示天下又公卿二千石皆輔主宣化政之  
本也而使不赴父母之喪人義替矣春秋傳曰上之所  
為民之歸也上使不為民或為之是以加罰假若上之  
所為而民亦為之向其化也又何誅焉假使大臣皆不  
行三年之喪何以責之古者臣有大喪則君三年不呼  
其門可如舊禮以美風俗臣聞有夫婦然後有父子有

父子然後有上下有上下然後有禮義故夫婦之始王教之端也孔子曰天尊地卑乾坤定矣書曰釐降二女子媯汭言雖帝堯之女下嫁于虞猶屈體降下婦道于虞氏也春秋之義王姬嫁齊侯使魯主之不以天子之尊加諸侯也今漢承秦法設尚主之義以妻制夫失陽唱之義以卑臨尊違乾坤之道今誠改尚主之制稱尊卑之性則嘉瑞降天吉符出地是以萬物各得其叙矣書奏即棄去之庚子大赦天下秋八月黃龍見巴郡初

民就池浴相戲曰此中有黃龍因流傳民間太守上言  
時史以書帝紀是時政治衰缺所居多言瑞應皆此類  
也本志曰瑞興非時則為妖孽為言雖虛此為龍孽也  
冬十月壬戌南宮平城內屋壞十二月丁丑帝崩于德  
陽殿初河間孝王生解瀆亭侯淑淑生萇萇生宏帝崩  
無嗣太將軍竇武召御史劉儵儵盛稱宏于武武與太  
后定策禁中太后詔曰大行皇帝德載天地光照上下  
不獲胤嗣之祚早棄萬國朕憂心摧傷追覽前代法王

后無適即擇賢近親考德敘才莫若解瀆亭侯宏年十  
有二歲然有周成之質春秋之義為人後者為之子其  
以宏為大行皇帝嗣使光祿大夫劉儵持節之國奉迎

後漢紀卷二十二